

«Igl ei buca legher, quei che schabegia momentan»

Avon in'jamna ha Mathilda Derungs da Glion lantschau in'acziun da solidaritad. Sco in'unda ei gl'agid vegnius, en fuorma da rauba e schizun da daners bluts. Damaun parta in camiun cun tshun tonnas material d'urgenza rimnada en Surselva per la populaziun dall'Ucraina.

AUGUSTIN BEELI/FMR

L'Ucraina ei in grond stadi, cun 603 548 km² il pli grond dall'Europa. La solidaritad cumprova che quella naziun, liberada dall'Uniun sovietica gl'ost 1991, s'audi tier l'Europa. Tut ils stadis dil vest e digl ost, cun milliuns carstgauns, ein consterni da quei che schabegia. L'offensiva brutala e stuorna irritescha, tementa e sveglia las emozziuns. L'jamna vargada ha *Mathilda Derungs* da Glion buca pli saviu restar ruasseivla, ella ha mess en moviment ina rimnada da material pils carstgauns pertuccai dall'uiara (mira LQ dils 2-3-2022). In'jamna pli tard ei rodund tshun tonnas rauba semtgada. Ella remisa dalla Viafier retica alla staziun da Glion han rodund 20 persunas luvrau sco furmiclas. In'equipa da voluntarias e voluntaris ei seformada sponanamein enteifer paucas uras. Quellas persunas han pachetau, sortau ed etichettau tut igl uorden en scatlas conformas.

Gidau cun daners

Gl'agid ch'ella ha retschert vegn buca mo da Glion e dalla Foppa. «Da Mompé Tujetsch, da Val S. Pieder, ord Lumnezia e si da Panaduz ei la glieud vegnida cun rauba», raquenta Mathilda Derungs ed aschunta ch'ei hagi uss ella remisa silmeins 500 sacs da durmir. Ella ei comentada dall'unda gigantica da solidaritad pil pievel ucranes.

Il davos gis hagi la glieud cuntinuau a purtar rauba, ed adina dapli maglias. La confidanza ei enorma. Ella hagi era survegniu daners da glieud che ha giavischau ch'ins cumpri material e vivonda. «Cun rodund 1500 francs havein nus sa-



La grappa da voluntarias che era fatschentada ier cun semtgargl'orden.

FOTO AUGUSTIN BEELI

viu cumprar maglias, mo cunzun bugliers d'aua e radiatur per scaldar», raquenta Mathilda Derungs.

Giuvenils han seschau engaschar

All'entschatta haveva ella quintau da saver ir a Cuera cun ina camiunetta pleina ch'ella vuleva surdar alla rimnada dall'uniun Agid all'Ucraina da *Retus*

Sgier e Maria Wolf-Beskorovaynly. Tut ei vegniu auter. Ussa va in camiun dalla Surselva direct a Berna. Quei che ha plaschiu specialmein all'organisatura da Glion ei che era giuvenils han seschau engaschar. Zacons scolars dil scalem superiuor ch'ei savens silla rampa dalla remisa per s'entupar cun cameratas e camerats han luvrau sco voluntaris. Els han purtau pacs, emplunau car-

tuns e duvrau lur forzas per l'acziun da solidaritad.

Gl'autist *Claudio Montalta*, in aug digl impressari da transports *Manuel Montalta*, parta damaun cul camiun viers Berna. «El ha manegiau ch'ei fagessi sennad ir cul camiun direct a Berna enstagl da transcargar la rauba a Cuera.» Getg e fatg, la decisiun ei stada spontana e senza formalitads. Mathilda Derungs vul ca-

«Quell'uiara ei ina nova dimensiun per nus Europeans. Quei tucca nus emozionalmein sco mai»

Voluntaria

cumpignar il transport. «Jeu vi veser mezza nua ch'il material vegn a Berna e co il convoi per l'Ucraina vegn semtgau», gi la dunna ch'ei actualmein vicepresidente dil parlament communal da Glion. Ina dallas dunnas da sia squadra da voluntaris ella remisa aschunta: «Quell'uiara ei ina nova dimensiun per nus Europeans. Quei tucca nus emozionalmein sco mai».

«Numerus destins tragic»

Da di e magari era da notg scalina il telefon tier Simon Camartin ni ch'in e-mail dall'Ucraina arriva. Igl ei glieud ch'ei sin desperar; umens, dunnas ed affons che san buca co ei va vinavon. Bandunar la tiara ei in'opziun, mo per biars eis ei ina via el malguess. Per entgins ha il convischin da Mustér che ha biaras relaziuns cun persunas dall'Ucraina, gia anflau ina soluziun da star sur notg ed aschia da fugir dall'uiara e vegnir en Svizra.

HANS HUONDER/FMR

Prest duas jamnas cuoza l'attacca dalla Russia silla Ucraina. Denter 1,5 e dus milliuns Ucrains han gia bandunau la tiara. «Il mument regia ina desperaziun totala. Per biars va ei ussa per spindrar l'atgna veta», di *Simon Camartin* cun vusch inquietada ed accentuescha: «Biars vulan batter per l'indipendenza futura da lur tiara. Sche la Russia victorisescha svanescha l'Ucraina numnadamein dalla carta geografica.» Fertion che gl'ost ed il sid dall'Ucraina ein stai el center dall'uiara l'emprema jamna, sentan era las parts dil vest dalla tiara che l'agressiun s'avischina.

Star aschi ditg sco ei va

Bia glieud smina che l'Ucraina vegn baul ni tard probablamein a stuer suttacumber. Biars vesan l'emigraziun sco suletta soluziun, mo els restan ella tiara aschi ditg ch'els vesan ina sbrenza da speronza. Quels che bandunan la tiara – pil pli suletamein cul pli necessari – ein era cunscients ch'els vesan forsa mai pli la patria. «Emigrar ei cumbinau cun malsegirtads ed in avegnir incert. Igl ei buca mo il viadi naven dil dacasa, mobein era quel atras pliras tiaras. Buca tuts han enconuschents ni parentella el vest e san tgei che spetga sin els. Negin banduna bugen sia patria», constatescha *Simon Camartin* e di: «La veta culturala en quella tiara che fatschentava nus stat ussa gnanc en discussiun. Negin tshontscha da projects digl avegnir, ussa va ei per vegnir aschi spert sco pusseivel ord la situaziun actuala e surtut surviver.»



Oana e Simon Camartin ein en contact cun bia glieud ell'Ucraina. Per entgins dad els ch'ei sin fuigia han els gia anflau in suttetg cheu tier nus.

FOTO HANS HUONDER

Svizzers ein prompts da segidar

Ina differenza dalla tenuta vesa *Simon Camartin* era ella vegliadetgna dalla glieud: «Il giuvens che vulan in bien avegnir studegian probablamein buca duas ga d'emigrar. Il vegls perencunter ein gia stai confruntai cun in'uiara. Els vegnan a tertgar: Lu eis ei era iu enzaco.» *Simon Camartin* ha giu contact cun ina dunna giuvna che havess fatg la matura proxima. Quei vegn buca ad esser pusseivel, aschia che sia via pren ina tutt'otra direziun che previu: «Aschia dat ei numerus destins singuls tragic.» E lu tradescha *Si-*

mon Camartin aunc in auter cass: «Tschiedi sun jeu vegnius contactaus d'in musicist ch'jeu enconuschel bein. El sto restar ell'Ucraina, vul denton che sia dunna e siu fegl sappien vegnir en Svizra. Per els eis ei reussiu d'anflar dimora el Grischun.» El hagi retschert spert da differentas persunas la caparra ch'ellas hagian combras ni habitaziuns per Ucrains sin fuigia.

Aua e da magliar maunca

Sin fundament dils biars discors al telefon dil davos temps sa *Simon Camartin* ch'ei maunca ualti bein tut ell'Ucraina:

«Negin banduna bugen sia patria»

Simon Camartin

«Els loghens pertuccai il mument il pli fetg dall'uiara mauncan auva e vivonda, mo era medicaments. Quei eis ei grev d'organisar, per talas acziuns d'agid ein las instituziuns responsablas. Quels che ston restar leu ni che bandunan la tiara duein denton saver ch'ei dat bia glieud sin quest mund che vul s'engaschar per els, che patratgan vid els.» Ina caschun da segidar seigi segiramein da dar daners: «En sesez emporta ei buca a tgei instituziun. Quels daners van segiramein el dretg liug.» *Simon Camartin* zuppenta denton era buca ses panzieris e co la situaziun ell'Ucraina engreviescha el personalmein: «Jeu schess manzegnas, sch'jeu schess che tut quei fetschi buca mal il cor. Mes panzieris motiveschan denton mei da s'engaschar sco jeu sai. Igl ei in engaschament ch'jeu quintavel buca pli da stuer prestar en mia veta. Mei engreviescha surtut il destin dil singul, per quellas e quels ch'jeu vesel ch'jeu sai far nuot. Ensem cun mia dunna ed autras persunas fagein nus denton tut il pusseivel.»

Ucraina era sin ina buna via

Simon Camartin enconuscha l'Ucraina dapi decennis. El decuors da quei temps ha el era saviu persequitar il svilup dalla tiara: «Il vest dall'Ucraina era sedrizzaus il davos onns en direziun Europa Centrala. Leu saveva la glieud viver bein. Ins senteva mintg'onn in bien progress. Auter era quei egl ost dalla tiara. Lezzas regiuns ein buca sesviluppadas fetg ils davos onns, las differenzas economicas denter las differentas regiuns ein relativamein grondas.» Tenor *Simon Camartin* ei la coesistenza denter il vest ed igl ost dall'Ucraina buca vegnida promovida sufficientamein. La conseguenza ein tensiuns, era denter las differentas regiuns linguisticas: «Cunzun egl ost eran il lungatg russ ed il patertgar russ aunc adina fetg ferm. Per quei motiv ha ei lu era dau la separaziun cun las regiuns Donezk e Luhansk ch'ei in la fin finala vegnidas reconuschidas dalla Russia il fevrer sco stadis independents. Ilse emprems presidents dall'Ucraina han munchentau d'anflar soluziuns per in avegnir communabel senza tensiuns.»